

Bi haenx ngoenzciet “roek it”, boux caencik ndeu dwk dienhvah daeuj naeuz gou nyi, de dawz di doxgaiq lwgnyez gwn ndeu geiq aen cimienhbau ndeu daeuj hawj dahlgw iq gou, daengq gou youq bakdouranz deq ciepsou. Aen ci haenx, dwg ci danhvei boux caencik haenx, cienmonz ciepsoungq vunz hwnjban roengzban, ngoenzngoenz lohgvag bakdou ranz gou, gou baez raen couh nyinh ndaej ok aen ci neix.

Yaep yiet, aen ci couh youq bakdouranz gou dingz roengzdaej, gou ndwn youq baihgvas ci, daj cuengci couh yawjraen gij doxgaiq haenx cuengq youq ndawci baihsuix.

Aenci neix, baihlaeng miz songbaiz daengq, song dahsau naengh youq baiz daih’ it, gij doxgaiq haenx couh youq henzdin songde.



Song dahsau neix, gou roxnaj, gyoengqde cungj dwg youq camhsoungaenz goengloh sou ngaenz.

Gou naeuz: Dahnuengx sou dawz gij doxgaiq haenx ndenq gvaq daeuj hawj gou mbat ndeu vei.

Song dahsau mbouj oksing. Boux ndeu mazmwnh dwk yawj roen baihnaj, lingh boux aengyauej ngengq

gwnz eijci, fouqda de yaek laep mbouj laep, mbouj miz byawz leixlangh gou. Seizneix gou miz di mbouj ndei eiqsei, caemhcai q mizdi geizheih: Aen danhvei gyoengqde dwg fuzvu hangznieb, bingzseiz cungj dwg dizcang “riunyum fuzvu”, seizneix song dahsau neix baenzneix damhdingh, daj gij byaujcingz songde gou lij yawj ndaejok songde miz di ndaengqcawq dem. Seizneix gou mbouj rox baenzlawz guh ndei. Gou rox, seizhaenx dwg seiz roengzban, songde mbouj itdingh aeu guh “riunyum fuzvu”, gou hix mbouj miz leixyouz yiugouz songde hawj gou “riunyum”, hoeng, daj laexmauh fuengmienh daeuj gangj, cix mbouj wnggai baenz neix damhdingh ba?

Gou nyengh yaep ndeu, boux haici haenx raen baihlaeng mbouj miz vunz dapwngq gou, cix naeuz, mwngz

byaij gvaq mbiengj ndeu bae gag hai douci gag aeu ba. Gou naeuz, ndei.

“Byaij gijmaz byaij, daj cuengci ndenq okbae mbouj ndaej la?” Mwh gou yaek cienq ndang byaij seiz, dingqnyi sing miz vunz gangjavah, seizneix gou cij rox lij miz vunz naengh youq baihlaeng song dahsau, gou baez yawj, laxlawz dwg dahcej seiqcib lai bi ndeu.

Dahcej doq gangj doq gungjhwet ndwn hwnj, dinfwngz riengjri dwk dawz gij doxgaiq haenx daj dangqnaj song dahsau haenx ndenq hawj gou, gou gamjdoengh dwk laebdaeb gangj geijcoenz “gyo’mbaiq”.

Seizhaenx, song dahsau neix lij dwg gij yiengh “sach mbouj gvan gou, mbouj leix mbouj langh” haenx. Gizaed, songde mbouj yungh doengh din hix mbouj yungh doengh ndang couh guh ndei gienhsaeh neix, hoeng……

Ci hai bae gvae lo, gou cix lumj fatbag nei ndwn youq giz haenx, baenzlawz cungj siengj mbouj doeng: Mouj dwg gienh saeh yietfwngz couh guh ndaej ndei ma? Baenzlawz mbouj haengj guh ne?

Nyienh gwnzbiengz laedoengh lai di raeujrub, noix di sim damh naj saep! Yienghneix, seiqgyaiq couh engqgya maez vunz lo.

Doengzhag Donhcieuh Cingz

同学半世情

□Lanz Han’gvangh/蓝汉光

Mbwk:Doengzhag geiq saenq daengz, Nuengx song fwngz bae cieq; Hai doeg yieb youh yieb, Raemxda diet(lae) lumj fwn.

Raen saenq dangq raen naj, Siengj nanzgvaq cibfaen; Doengzhag geiq saenq daengz, Nuengx song fwngz bae cieq.

Doeg daengz beix sawfaenz, Rox mwngz goj lij nyieb(niemh). Hai doeg yieb youh yieb, Raemxda diet(lae) lumj fwn.

Sai: Ciep ndaej nuengx hoiz faenz, Hai yawj dungx liengzyauj; Doeg bae youh doeg dauq, Raemxda dauj lumj fwn.

Raen saenq gangj cix rox, Siengj ndeigyoh cibfaen; Ciep ndaej nuengx hoiz faenz, Hai yawj dungx liengzyauj.

Niemh doengzhag gamjcingz, Ndawsim geiq daengz laux; Doeg bae youh doeg dauq, Raemxda dauj lumj fwn.

Mbwk:Dawz saenq beix ma hai, Va gwnzdaiz caen haen; Coenz ndei coenz gw daengh, Coenzcoenz doeng simdaej.


Un bancoz gaxgonq, Nuengx nyienh goenh hoz dai; Dawz saenq beix ma hai, Va gwnzdaiz caen haen.

Yienghyiengh cungj gvensim, Yied doeg sim yied maengx; Coenz ndei coenz gw daengh, Coenzcoenz doeng simdaej.

Sai: Hai sawsaenq ma joj, Fangz ndaw moh caen gyangz; Nuengx souh hoj souh hanz, Beix simfanz nanzgvaq.

Dingq nuengx gangj hojcingz, Haemh ninz caen doek loq; Hai sawsaenq ma joj, Fangz ndaw moh caen gyangz.

Duenh youh duenh sinhoj, Mbouj rox yienghlawz bang; Nuengx souh hoj souh hazn, Beix simfanz nanzgvaq. (caengz sat)



Mbanjcuengh Gyaundeil Lai

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangj sij Cinz Siengzcouh Liuz Gingliuj Cinz Siengzgen hoiz

Lizhai Bingzgoj le, gyoengqde itloh gaujcaz le Denzdungh、Denz-yangz song aen yienh luegdah Dahyougyangh neix. Gizneix dwg aen diegbingz saeq dandog Baksak Digih, caemh dwg aen dieg ok haeux Baksak Digih. Hoeng, aen Dieggumz Dahyougyangh neix doek fwn noix, mbwn rengx mbwn ndat lai. Haujlai bi daeuj, aenvih mbouj miz suiqli sezsih, haujlai nazreih mbouj ndaej saekdi souhaeuj. Youq sevei gaeuq, gizneix miz hot fwen eu yienghneix: “Guh naz cib baez ndaej saek baez, namhhenj gwn caez dangq guh donq; gwnz haw gai lwg raemxda roenx, fouznaih cij vih vuenh haeuxgwn.” Bi 1957 seizdoeng, youq swcigih gvansim lajde, Baksak Digih youq gizneix hwnj le aen Suijgu Dabakdoengj, geij fanh minzgoeng dingj nit ngoenz lien hwnz haenqrengz guh hong, bi 1958 hwnj baenz, ndaej rwed raemx hawj haj roek fanh moux dieggeng, 7 aen

gunghse souh’ ik, doiq gaijbienq gij dieg neix swnghecanj nungzyez miz gij cozyung gig youqgaenj. Veiz Gozcingh miz aen naemjap, buenxdoengz hongsaeh dienhraemx Guengjsae mbefat, dajsuenq youq gizneix guh camhguenqdienh, cou gij raemx Dahyougyangh hwnjdaej, rwed raemx hawj dieggeng, gaijgez gij vwndiz suiqli gizneix. Doenghbaez, vunzlai gizneix yungh aengonh daeuj gonh raemx Dahyougyangh, dwgrengz raix-

caix, yauqgoj mbouj hung. Youq nienzdaih doxbang doxcoengh, Mbanjsangdan vunzlai gonh raemx Dahyougyangh daeuj rwed naz, gyonj gonh 14 gaep raemx, daengx mbanj 56 boux vunzguhhong hwnz ngoenz mbouj dingz gonh baenz buenq ndwen, 300 moux haeuxgyang cij ciengigouq ndaej 5 moux.

Gij goengdaeuz dangjveij caeuq cwnjgufuj ndaw gih haenx cungj doengzeiq gij naemjap Veiz Gozcingh.

Daihgya nyinhnaeuz, Dieggumz Dahyougyangh haeux wnggai ok ndaej lai, cijaeu caenh’ itbough guh ndei suiqli, vanzcienz miz hojnaengz ok ndaej engqlai haeuxgaicawx, hawj Baksak Digih ndaej gag baengh swheij gaeuq haeux gwn. Yienghneix, gizyawz 10 lai aen yienh diegbya cix ndaej fazveih gij ndei bonjfaenh, cungdenj guh hong ndoengfaex、hong langh ciengx doihduz、doenghgogai caeuq huqdoj.

(caengz sat)